

梁溪先生文集

二十



梁谿先生文集

文  
百六十三卷

梁竒先生文集卷第



題跋上

道君太上皇帝御書跋尾



淵聖皇帝御書跋尾

皇帝御書跋尾

皇帝御書詔書記

道君太上皇帝賜宋喚御書跋尾

皇帝御筆勉行詔書跋尾

皇帝御筆賑濟詔書跋尾

淵聖皇帝東宮賜詹事李詩御書跋尾

靖康皇太子學書跋尾

道君太上皇帝御書跋尾

宣和七年十二月二十二日有詔內禪二十四日

淵聖皇帝即位靖康元年正月三日 道君太上皇

帝行幸東南八日金寇犯闕二月十日退師三月

道君回鑾自鎮江府次于南京有旨詣亳州太清

宮酌獻是月十六日臣被命奉迎二十日至南京次

日對於 內殿奏陳 淵聖孝思願以天下養之意

道君泣下慰勞久之二十二日扈從詣鴻慶宮燒香  
還宮再召對敷奏移時有 旨罷幸太清宮令臣持  
御書及小字青詞赴 闕二十三日朝辭面賜玉帶  
牙簡即具錄所得 聖語奏聞奉 淵聖御批有知  
卿奏對忠義煥然之語二十五日到闕對于 垂拱  
殿以所賜帶簡繳納王府蒙降旨再賜四月初三日  
道君行宮次京城外 車駕出郊奉迎是日 道君  
入居龍德宮臣還自南京前後二被 道君御書皆  
送呈 淵聖 旨再賜謹摹勒其一刻諸琬琰以

次其傳紹興二年八月五日具位臣李某謹跋

淵聖皇帝御書跋尾

臣靖康初誤蒙 淵聖皇帝識擢承乏政府凡半年  
被命宣撫兩河自出師至以疾丐罷凡五十餘日前  
後祇受 御筆七百餘件裝褫成七十軸寶藏私家  
謹以 詔書宣諭批荅五道摹刻于石紹興五年七  
月五日具位臣李某謹跋

皇帝御書跋尾

皇帝以丁未歲五月朔日張士大元帥登寶位前數

日以御書遣官齎至燕湖北路賜臣迄今九年矣  
臣以衰病屏伏海濱今年春被受詔旨令條陳邊防  
利害來上臣具奏以聞七月十七日伏奉親筆詔  
書所以褒寵者甚渥臣不勝感恩榮幸惶懼戰越之  
至謹摹勒上石以示萬世紹興五年八月五日具位  
臣李 謹跋

皇帝御筆詔書記

皇帝在御之八載歲次甲寅冬十月叛臣劉豫借助  
強虜稱兵南牧侵擾淮堦邊奏來上有詔親正戎

軍啓途六師雲集號令賞罰悉出宸衷將士奮勵  
人百其勇捷音條路屢奏膚公虜氣震龍潛軍霄道  
策勲歎至慶齊畢行皇帝慨然悟前日退避和議  
之非治兵飭備有不可已者乃於寇退之初圖爲善  
後之計發德音下明詔以攻戰守備措置綏懷  
之方詢于舊弼微臣嘗叨近司亦與諮訪之列竊自  
惟念受知最早荷恩特深平時常恨屏跡遐遠徒抱  
孤忠不獲以芻蕘之言達于丹宸恭承清問其敢函  
莽滅裂以對旣竭鄙慮條具上聞仰塞詔旨又以

朝廷根本時務之所當先者六事冒瀆 天聰惟是  
學識迂踈言辭拙直大懼不足以裨 廟筭之萬一  
伏蒙 聖慈容以天地之度燭以日月之明赦其狂  
瞽而察其拳拳之忠 親御翰墨降詔褒諭所以寵  
綏之者甚渥訓辭溫厚有金聲玉振之章筆蹟瓌奇  
有鸞翔鳳翥之勢天光下逮部屋生輝顧臣愚庸何  
以報稱竊觀自昔帝王當承平無事之時圖回治績  
未嘗不以求言為急務故堯有衢室之咨舜有總章  
之訪禹重曷言湯稱好問况於履艱難之運建不世

之勲哉秦詢黃髮而霸業成漢屈群策而帝功立光  
武用寇鄧耿賈之謀而炎運復興太宗聽房杜王魏  
之言而唐室大競古今一理何莫由斯仰惟 皇帝  
圖治之勤求言之切博詢精考斷以必行無愧前古  
則夫并天下之謀兼天下之智以夫有為修舉政事  
震耀威武削平僭偽底定中原紹復 祖宗之大業以  
致中興有不難也臣雖衰病待盡山林傾耳拭目猶  
庶幾及見之謹以 御筆詔書摹勒成碑以昭示天  
下使知 聖君不忘舊臣詢事考言樂取諸人以爲

善者如此用為獻言者之勸不其臆歟紹興五年歲次乙卯 月二十有五且位臣李 謹記并書

道君太上皇帝賜宋喚御書跋尾

宣和內禪燦然明白與堯舜比德視唐三宗為不足道靖康之初金狄犯闕 道君南幸淮浙 淵聖固守京師兩宮間隔陰有小人交鬪其間所以寇退二聖重歡略無疑阻者實賴不二心之臣調護之力也至靖康末在廷之臣多罷去以唐恪聶山耿南仲父子用事專以 其身固寵之資偃然自謂外

敵之不足慮迨虜騎再至 道君不得行入居禁中淵聖始感悟罷唐恪相出聶山耿氏父子奉使割地稍召還舊人然亦已晚矣都城既破翠華北狩天下臣子所同憤慨咸謂敵強我弱之所致殊不知禍變之興以小人離間為基胎也夫處人父子間號為至難况當國家艱阨之際宗社生靈安危休戚之所繫哉其後唐恪仰藥而死聶山為絳人所誅耿氏父子全家陷沒相繼殂隕天之報施豈不昭然方靖康丙午春呂備位樞廷被 旨奉迎 道君於南都時徽猷



閣待制淮南江浙荆湖制置發運使宋喚適自淮甸  
召還入對又奉 淵聖御書如行宮邂逅相見甚款  
聽其言蓋惓惓有意於兩宮者及紹興丙辰夏臣承  
乏江西帥事復與晚會於豫章喚出示 道君御書  
所以褒獎之者甚厚翰墨如新伏讀相與流涕乃知  
前日之言信不誣也追思往事十有餘年如一夢間  
變輿滯於沙漠而未還中原困於蛇豕而未復痛心  
疾首不如無生今者天啓 上心念父兄之辱親御  
戎輅以臨大敵將士奮勇盡殲醜類靈旗所指其將  
恢復境上迎兩宮以還故都有問安侍膳之期乎杜  
甫有言周宣中興望我皇灑血江漢長衰疾此微臣  
今日之志也紹興六年十二月十四日具位臣李某  
拜首誓首謹書

皇帝御筆勉行詔書跋尾

臣昨者誤膺 眷獎起於閑廢之中付以方面之寄  
而臣憂患之餘重以衰疾深懼不足以仰副使令刻  
奏力辭至于再三屢被 詔旨不容遜避又蒙  
天恩親灑 宸翰式遘其行有卿宜以安 社稷為

已任勿間中外勉爲朕行之語顧臣學術迂踈材能  
淺薄何以當此雖力疾之官已數月餘龜勉職事僅  
免曠敗曾無尺寸涓埃之補此臣所以夙夜慙懼唯  
欲歸休山林以逃素餐之責也上章丐寵終冀矜從  
謹摹勒親筆詔書于石置豫章公宇中庶幾來者有  
以見 聖主待遇舊臣之意垂不朽云紹興六年八  
月十五日具位臣李 謹言

皇帝御筆賑濟詔書跋尾

臣今春入覲 天闕蒙恩內殿引對恭被 玉音撫  
勞良渥臣具以衰疾丐免新任 上宣諭曰江西旱  
災飢民乏食頗有流移煩死一行以寬憂顧臣俯伏  
受命不敢固辭疾驅之官次本路界首被 御前金  
字牌降到 親筆詔書委以勸積粟之家以其食用  
之餘盡數出糶以濟流殍之苦臣仰體 聖意與本  
路監司協力推行分遣僚屬督責州縣勸誘出糶庶  
幾實惠及民以稱 詔旨凡賑濟飢流民伍萬有餘  
以積粟糶者二十餘萬石亦有願獻錢穀以助賑濟  
者雖深山窮谷稚童孀嫠無不溲漉德澤保全其生

夏秋之交雨暘時若新穀倍收厥價十減七八民大  
和樂化愁嘆為謳吟變貧窶為富貴感召和氣導迎  
休祥實自 聖主仁心誠意之所感格或謂至誠不  
足以動天臣弗信也謹以 親筆詔書刻之金石以  
示萬世使知中興之運蓋有本云紹興六年八月十  
五日具位臣李 謹言

聖皇帝東宮賜詹事李詩御書跋尾

淵聖皇

德東宮十有

一三二

李恭儉敷聞四方

平居無

十惟以文翰自如

室暇逸觀所書道

三十九

八

知

德經少陵詩與太子詹事李詩帖其玩意篇籍尊禮  
師傳謙光日新之德可謂盛矣使當承平為繼體守  
文之主周之成康漢之父景何以遠過惜乎炎運中  
微金冠孔熾嗣大寶於國步艱難之中謀夫不臧卒  
蒙大難此忠臣義士所以夙夜痛心而泣血也歲在  
丙辰臣蒙恩來帥豫章僚屬許忻出前數書相示觀  
翰墨之如新想威顏之在望悵日月之易遠悼變輿  
之未還感憤激切不知所云紹興六年七月二十二  
日具位臣李 謹跋

靖康皇太子學書跋尾

靖康初某備位樞廷嘗一日同宰執奏事內殿蒙恩  
賜坐啜茶有 旨召 皇子國公出見宰執小帽窄  
衫玉束帶升自東廂至 御座前奏問 聖體西鄉  
與宰執相揖日角珠庭眉目如畫進止雍容儼若成  
人群臣咸竊竦歎後一月遂正東宮位號是年冬金  
寇再犯 闕都城失守 二聖蒙塵 皇太子亦北  
去天下聞之莫不痛憤嗟乎生帝王家正位儲貳有  
溫文之德有天人<sub>二</sub>之相一日倉卒至此此天命之所  
以難<sub>二</sub>也方 淵聖在東宮時嘗以 皇太子學書  
一幅贈詹事李公家藏至今其坊許忻出以示其  
之流涕謹誌其末庶幾觀者知流傳之所自云紹興  
六年七月二十二日具位李 跋

梁谿先生文集卷第

題跋中

書陳居士傳後

書四家詩選後

秦少游所書詩詞跋尾

玉局論陸公奏議帖跋尾

舉譚詩卷跋尾

書鄧南夫祭文後

了翁祭陳奉議文跋尾

蕭氏印施夾頌金剛經跋尾

跋王府君文編

跋了翁墨蹟

書杜子美魏將軍歌贈王周士

題定林寺清深堂

書金字華嚴經普賢行願品後

跋了翁楞嚴庵頌

跋了翁書杜子美哀江頭詩

跋了翁自跋敢疑論後



跋了翁墨蹟

跋了翁廣龜鏡錄

跋了翁所書華嚴偈

題所書普門品

書陳居士傳後

予嘗愛范曄作黃叔度傳初無言行可見之跡後之  
讀者想望其人如不可及今楊中立先生傳陳居士  
其文亦然居士生於僻遠雖無卓然顯白于世者既  
得佳傳又得鄒陳二公爲之書篆且跋其後以垂不  
朽讀者想望其人當與叔度齊驅而並駕云宣和二  
年五月十一日梁谿居士李某書

書四家詩選後

子美之詩非無文也而質勝文永叔之詩非無質也  
而文勝質退之之詩質而無文太白之詩文而無質  
介甫選四家之詩而次第之其序如此又有百家詩  
選以盡唐人吟詠之所得然則四家者其詩之六經  
乎於體無所不備而測之益深窮之益遠百家者其  
詩之諸子百氏乎不該不徧而各有所長時有所用

覽者宜致意焉偶讀四家詩選因書其後宣和庚子

仲夏十一日

秦少游所書詩詞跋尾

少游詩字婉美蕭散如晉宋間人自有一種風氣所  
乏者骨骸爾然要是一時才者沙陽俞跣出以示予  
爲跋其後宣和庚子仲夏梁谿居士書

玉局論陸公奏議帖跋尾

凡文之作貴如穀粟布帛適於用而達於理斯足矣  
予觀陸宣公居倉卒擾攘之間其奏議所陳動中時  
病屈折顛縷皆根抵仁義道理明白真得作文之體  
宜王局之敬慕而不忘也德宗在艱難時恃贄如左  
右手及信任裴延齡輩則弃之如弁髦土梗一斥不  
復真少恩哉宣和庚子仲夏梁谿居士書

舉潭詩卷跋尾

故奉議郎致仕潁川陳公事其母夫人樂氏以孝聞  
夫人旣捐館舍卜葬於舉潭公爲之築菴曰悟真堂  
曰遠遠亭曰歸真以爲祭祀焚修之所故樞密蔣公  
右丞陸公已下百餘人賦詩以詠歌之而夫人淑德

懿行益彰聞于時予來沙陽不及識公而與其子正

式遊間造隱圃觀池亭竹英廟嫌諱之美皆公身光堯御名而

手植者可以想見其為人正式一日捧舉潭詩卷裁

書屬予曰先子平昔留意於此既得修撰羅公序其

前矣願吾子跋之以垂不朽予一再辭不可則為之

言曰天下之大戒二其一義也其一命也臣之事君

義也道合則從不合則去子之事親命也不可解於

心故其生之所以養死之所以葬既葬而築室以為

祭祀修之所又求當世顯人與賢士大夫書而歌

之不如是則孝子必慊然有不足之心焉若公者其

於事親可謂無所慊矣予聞公年十即謝事優游

燕閑凡二十年雖耄而聰明不衰臨終怡然而化則

其胷中所養宜如何哉惜乎不及識而聞其聲歎之

餘也予既賢公又嘉正式能成先志勤勤而不倦於

是乎書宣和二年 月三十日梁谿居士跋

書鄧南夫祭文後

不知其父視其子不知其人視其所與遊予來沙陽

時南夫已死不及識識其子肅俊美而力學有以見



南夫之義方及觀了翁祭文右文羅公之跋尾乃知  
二公平昔皆與南夫游從厚善其所稱道不妄又有  
以得其行已之大槩然則予雖不識南夫固已深知  
其爲人矣南夫雖不通於時有令子以傳家又得名  
卿碩儒之文悼惜而振發之可以垂於不朽夫又何  
憾宣和二年二月九日

了翁祭陳奉議文跋尾

予昔邂逅見了翁於姑蘇觀其容貌渥然而不枯察  
其志氣浩然而不挫聽其辯論毅然而不屈竊謂近  
世以來善處患難未有如了翁者今於沙陽見了翁  
祭其兄奉議公文辭意之高潔筆力之遒健與昔見  
其容邈志氣辯論無少異焉信乎養之欽廟嫌諱守之固  
而文章字畫似其爲人也宣和庚子秋梁谿居士跋

蕭氏印施夾頌金剛經跋尾

予嘗讀易觀六十四卦爻象彖辭不離文字而孔子  
繫之曰神無方而易無體又曰生生之謂易然則六  
十四卦爻象彖辭果足以爲易而所謂易者果何物  
哉及讀釋氏妙法蓮華經觀二十八品譬喻言說亦

不離文字而其言曰佛說是經於八千劫未曾休廢  
又曰若以七寶滿三千大千世界供養於佛不如受  
持此法華經然則二十八品譬喻言說果足以爲妙  
法蓮華經而所謂妙法蓮華經者果何物哉即六十  
四卦爻象彖辭以學易易已明則六十四卦爻象彖  
辭如糟粕如筌蹄即二十八品譬喻言說以求妙法  
蓮華經經已見則二十八品譬喻言說如夢幻如響  
像然則易之所以爲易妙法蓮華經之所以爲經斷  
可識矣田是推之則釋氏之書所謂金剛所謂圓覺  
所謂般若所謂涅槃所謂諸菩薩萬行首楞嚴所謂  
大方廣佛華嚴一切大乘經典名字方便善巧種種  
不同無非明此一書者具眼人即其名以契其旨則  
讀誦書寫受持演說勝妙功德一念周圓宜其世間  
人天小果筭數譬喻所不能及也雖然理不礙事事  
不礙理文字諸相無非解脫故有以聲音讀誦以筆  
墨書寫以意念受持以議論演說亦能現獲不可思  
議報應寧不信然觀右文羅公序蕭氏印施夾頌金  
剛經其文高妙深達經旨又爲哀集持經報應十餘

事俾併刻之助發信心其於理事可謂無礙矣蕭氏  
求跋於予故予爲言學易之說使知儒佛初無二道  
學者當以心契之也宣和庚子九月三日梁谿居士  
跋

跋王府君文編

王以寧周士出其先府君手澤一編示余詩章雅麗  
筆蹟清勁真傳家之寶也靖康二年歲次丁未四月  
三日觀于潭府漕衙之翠藹堂武陽李伯紀

跋了翁墨蹟

余政和乙未歲自尚書郎謁告迎親零溪時了翁自  
天台歸通川與之相遇於姑蘇一再見有忘年之契  
後四年當宣和之初余以左史論事謫沙陽了翁方  
居南康其族人陳淵幾叟往見之余因寓書通懇懃  
且以序送淵并致意焉既而了翁答書辭意懇懇至  
舉狄梁公及本朝李文靖王文正二公事業以相勉  
予竊怪公相期太過非所敢當也又後七年靖康改  
元歲次丙午天子初內禪金寇犯闕余蒙異恩自  
奉常不旬日擢參大政實揔軍旅之事踰月寇退

宗社以安四方牧寧叨處樞輔追感知已恨公云亡  
不及見也未幾出使宣撫河北河東兩路月餘而罷  
旋即竄貶由建昌再謫川峽適盜據荆南路梗少留  
長沙前京畿提刑王君以寧不知於何處得公答余  
書彙獨闕其首數句示余俾追思補亡慨念平生爲  
之流涕教授吳君致堯復出公墨蹟數帖求余跋開  
卷讀之凜然如對面而聽其豐豐之言也吳君嘗從  
公游篤善好學因錄余書序及公所答書并以遺之  
以答其意且見公知余之厚去靖康二年四月三日  
武陽李跋

書杜子美魏將軍歌贈王周士

余趣寧江謫所取道湘潭王周士出高麗紙求書時  
金冠再犯闕將半年未解余聞 召命將糾義旅以  
援 王室萬一不捷當遂以死報國矣周士未果行  
而許爲之繼因書杜子美此篇遺之以激其氣云靖  
康丁未孟夏四日武陽李 書于長沙漕司之翠藹  
堂

題定林寺清深堂

李伯紀被 召赴 行在適汴流淺涸自臨淮遵陸  
道虹縣憇定林寺愛西堂幽邃竹木蒙密盛夏無暑  
氣目之曰清深堂命叔易篆其榜以贈長老昌公時  
建炎改元五月二十四日

書金字華嚴經普賢行願品後

大方廣佛華嚴經者諸佛菩薩信解行證大乘之祕  
軌也所說句偈不可量數而龍莫廟嫌諱傳於海經貝葉  
翻於震旦凡三十九品爲 十卷其後又得普賢行  
願一品是經深入不思議解脫境界成於普賢則

得願品之來雖無量句偈未悉宣布而華嚴宗旨固  
已畢陳矣有大比丘敏傳以金書是經將建重閣藏  
于雲巖禪刹余方謫居鄂渚假道脩江因施金碑書  
行願品附于八十卷之末庶幾華藏功德周圓法界  
含生均霑利益時建炎二年歲次戊申六月二十三  
日具位李 書

跋了翁楞嚴庵頌

了翁於世悲願宏深淪沒已久如以願力故當復再  
來觀其所贈東林珪老伽陀所謂休休莫莫不可說

此不可說亦不可三復其言而悲之再來時節因緣  
必不爾也戊申初秋望日

跋了翁書杜子美哀江頭詩

了翁得邵康節易數皇極先天之學心解神悟世故  
多能前知如丙午歲事嘗為所親者預道之壬寅春  
公未沒前數日其孫壻蕭君建功以紙求字公為書  
老杜哀江頭一篇乃絕筆也非惟筆力遒勁略無衰  
病之氣蓋寓意靖康之變於其間以公之學精微知  
數之必剛而平生議論慨然不少屈折雖流離顛沛  
妻子至亦凍餓而不顧可謂不以天廢人矣蕭君訪  
余於武昌出公書以相示為歎息者久之余嘗著論  
古人處天人之際者正與公合因并書以遺之使讀  
者知公於古人無間云

跋了翁自跋敢疑論後

了翁晚年嘗語所親曰吾往年以論事遭憂患他無  
足恤所懼者惟死耳今則死生皆置度外未嘗動心  
觀其自跋敢疑論後殆懼死時語也其後謝謫官表  
云海島萬里不如無子之無憂江湖一身彌覺有生

之有患則了無懼意夫死生亦大矣以了翁之學至  
晚年然後不以動其心其難如此學者可不勉哉

### 跋了翁墨蹟

了翁書法不循古人格轍自有一種風味觀其書可  
以見氣節之勁也臨江蕭君從翁遊得其片紙數字  
皆緝錄成篇可謂好學也已使爲善積累如此何所  
不至在勉之耳

### 跋了翁廣龜鏡錄

蘇許公中樞龜鏡錄執國柄者可以書紳了翁廣之  
有味其言也

### 跋了翁所書華嚴偈

諫議陳公留心內典尤精於華嚴手寫數過前後抄  
錄其要積累編帙平生踐履惟以澤物爲心處憂患  
如游戲蓋深解乎此觀其所書世間法界等語真知  
言之要哉

### 題所書法華經普門品

諸佛菩薩不捨慈悲不厭生死以濟群品而觀世音  
菩薩悲願洪深與十方法界衆生有大因緣能施無

畏之力為諸衆生之所依怙故普門品言若有無量  
百千萬億衆生受諸苦惱一心稱名觀世音菩薩即  
時觀其音聲皆得解脫即理而言所以表法謂如一  
念執惱即落火坑一念變異即飄墮羅刹鬼國一念  
瞋毒即為蛇蝎惡獸一念貪恨即為惡人怨賊一念  
殺害即為刀杖一念繫縛即為桎械枷鎖而觀世音  
者豈異人哉稱其名號觀其音聲旋倒聞機反聞自  
性則諸苦皆空應念解脫然理不礙事事不礙理故  
有常令恭敬供養觀世音菩薩者隨感而應如影逐  
形如響若聲真有火坑變成池者真有脫羅刹惡鬼  
之難者真有刀杖段段壞者真有桎械自脫者威神  
之力不可思議佛如實說非虛語也某遇先妣衛國  
夫人吳氏忌辰既書楞嚴經觀音圓通品以施澧州  
夾山長老覺海大師善能使置所建觀音正法樓中  
以資真福又書法華經觀音普門品以遺之使瞻禮  
者知菩薩威神之力不可思議如此二經相為表裏  
不可闕也理事雙修所謂觀世音者庶幾人人見之  
建炎己酉正月七日書



梁谿先生文集卷第



十三

十三

十三

梁谿先生文集卷第

題跋下

跋道鄉墨蹟

跋李先之墨蹟

跋襄陵春秋集傳後

書寄崧老易傳後

跋東坡書

跋山谷書

跋山谷草書

跋米元章書

跋曹馬摹本

跋歐陽公書

跋石曼卿書

跋東坡小草

題唐朝賢將傳後

題修西方念佛三昧集要

跋司馬溫公帖

跋顏魯公與柳冕帖

跋司馬溫公趙清獻公帖

跋鄒公詩

跋慶餘長老開堂疏

疏附

唐子方林夫送行詩章表跋尾

跋張嵇仲樞密遺藁二

跋趙正之所藏東坡春宴教坊詞

醉筆

草聖

行書

跋溫公帖

書陳瑩中書簡集卷

跋道鄉墨蹟

侍郎鄒公碩學勁節為天下之所宗仰詩銘精深有古作者之風字畫似其人自可寶也

跋李先之墨蹟

余平生不識李先之獨聞其為人經術修明議論勁正節操高邁趣與時異久困州縣間靖康初首薦之緊遷國子祭酒而先之初未嘗到都城其後余謫雲

二十九

二

八

安道南昌遊西山玉隆觀乃聞先之赴召至京畿道阻不得進而還相差數日不及見建炎初復除秘書監促其來未幾余丐罷相東歸亦不知先之曾供職否也臨江蕭君訪余於武昌首詢先之則云病不能赴行在所已亡矣 朝廷以寶文閣待制贈之因出其往來書帖一卷相示又云先之亦以不一見余為恨余於先之不為不相知而卒不一識面士相見之難如此可勝歎哉先之與陳瑩中游定夫一流人凋落殆盡良可為天下可惜也

書襄陵春秋傳後

孔子道大天下莫能用因魯史作春秋以俟後世君子雖其義難知然大旨不過尊王黜霸褒善貶惡內諸夏外夷狄志天道謹人事而已春秋經世其言簡而法三傳緯經其說博而詳簡而法者必待夫博而詳者載事實釋義例然後聖人之志因以不泯而後世得以知之猶天之垂象昭回森布推步占驗非得甘石之書則何以仰觀此三傳之於聖人所以不為無功也然三家者所聞見異辭所傳異辭各有所長

而時有異同不合之說則學春秋者宜精思深考揆之以道索之以理取其是而去其非則聖人經世之志得矣或者舍經而信傳則是得枝葉而忘本也棄傳而觀經則是去甘石之書而窺天也二者胥失余患此久矣襄陵許崧老作春秋集傳取三家之說不悖於聖人者著之篇而刪去其所不然又斷以自得之意有發於三傳之所不能言者得而讀之今上嫌諱然如披雲霧而覩天日之清明燦然如汰沙石而見金玉之精粹然後知三傳果有功於春秋而集傳又有

功於三傳至於斷以自得之意則與夫三家者齊驅而並駕也其於學者豈小補哉噫孔子作春秋而亂臣賊子懼蓋筆削之際游夏不能措一辭使得其時而道可行於天下則誅賞廢置宜如何哉雖不見行事而垂之空言猶足以使後世知君臣父子之道故太史公曰有國者不知春秋前有讒而不見後有賊而不知為人臣不知春秋守經事而不知其宜遭變事而不知其權為人君父者而不通春秋之義必蒙首惡之名為人臣子者不通春秋之義必陷於誅死之罪其實皆以善爲之而不知其義被之空言不敢辭然則學者其可不盡心乎欲盡心焉當自此書始建炎己酉歲正月五日武陽李其書

書寄崧老易傳後

曳其輪之象妙處在曳曳者自後牽車以緩其行也坎爲輪輿既濟未濟互體皆有坎而初二處其後故象爲曳其輪睽體亦然故六三之見上九爲見輿曳自六三觀之則上九處坎體之後疑其無適已之意故也曳之象皆在睽爻則非才之剛而此武有

力者安能曳車以止之哉至賁之初九亦處坎體之下則以舍車而徒爲象此之謂唯變所適由是觀之豈非字字有象而互體之類曷可少哉此秘殆亦昔人所未覩也前所錄數十條皆考於象而爲之說既與世之說易者不同於襄陵易傳亦有合不合者願參考之取其是而削其非因風詳以誨諭爲望聖人立象以盡意雖如觀天下之不可窮然意之所在要有至當去處吾儕即象以求之正如法家斷案鋪陳法律求所以當其罪而止耳不當其罪則以笞杖爲徒流相去遠矣此所以必資於講貫之益在允君子以朋友講習理義之說孰有大於此惜乎江海之遠絕而音問之難通也此編切告勿以示人非唯尚口乃窮之時不足以取信於世亦其間有未安者隨得隨改也所著易傳九卷總論一卷外篇釋象七卷訓辭三卷明變類占衍數各一卷合二二卷俟定居當悉錄致左右以求證明唯痛加斤斧乃所望也

跋東坡書

東坡書初類李邕中類徐浩晚乃自寫一家其用筆

側以取勢與柳公權之論殊不同必有能辨之者

跋山谷書

山谷行書多匾側此卷獨不然殊可愛也梁谿病叟  
觀于都嶠山陰

跋山谷草書

山谷晚年草書之妙追步古人張顛懷素正應此爾  
跋米元章書

米老書深得古人運筆意但不可求於規矩法度間  
耳書體出於瘞鶴銘多行草少見其真書護所短故

耶

跋曹馬摹本

龍眠摹寫曹將軍馬山谷草書少陵丹青引筆蹟妙  
甚可為十軸之冠

跋歐公書

歐陽文忠公書清勁自成一家公嘗言學書如逆風  
行舟用盡氣力不離本處蓋不以書自許士夫寶藏  
其蹟非以名節可貴故邪意外得謗無如公者賴韓  
富諸公辨明之乃得自白于世故陳筮中嘗跋其書

云使嘉祐前見此書者皆如今日則朋黨之論何由而興東坡亦以夢奠之後履傳千祀證之艱危多在於生前而是非常定於身後可勝慨哉

跋石曼卿書

石曼卿與范文正歐陽文忠蔡君謨蘇子美遊皆以豪傑許之好事者至稱其仙去觀詩篇筆蹟真一代偉人也

跋東坡小草

東坡居儋耳三年與士子遊墨蹟甚多余至海南尋訪已皆爲好事者取去靡有存者甚哉好惡之移人也方紹聖元符間擯斥元祐學術以坡爲魁惡之者必欲置死地而後已及崇觀以來雖陽斥而陰予之殘章遺墨流落人間好事者至龕屋壁徹板屏力致而寶藏之惟恐居後故雖鯨海萬里搜衷殆盡此與跡削於生前而履傳於身後者亦何以異北歸次端溪郡守陳侯出示小草一幅云得於錢塘僧舍蓋坡倅杭時所書也士夫所藏真行多而草少此幅尤可寶愛云



題唐朝賢將傳後

梁谿病叟曰為將三卅道家所忌豈非陰謀多而以殺戮為事故也惟懷仁輔義公正無私宅心慈恕以殺止殺常出於不得已者可以無咎而慶流後人唐朝賢將多矣獨郭子儀李晟號為後嗣能出其家子儀忠厚長者未嘗妄殺而晟克復長安市不易肆遠方信宿而後知王師之入前史謂三王之兵不過如此身享安榮子孫蕃昌且多賢者天之報施詎不信夫善為將者宜鑒于茲

題修西方念佛三昧集要

慶國夫人鄱陽張氏謹發虔心募工鏤板印造修西方念佛三昧集要一部普勸發無上菩提心者至心歸依西方淨土懇勤恭敬念誦阿彌陀佛尊號如法修行盡此報身隨願往生同成佛道一切有情均霑利益紹興三年歲次壬子三月中澣日題

跋司馬溫公帖

朝廷之上事貴當而不貴苟寬言貴盡而不貴苟合苟寬則姑息苟合則雷同而其弊自不可勝言者熙

寧閣定謀殺聽以按問欲舉自首泐等之法然不為  
寬而廷臣毅然爭之反覆論難不已至有以罪去者  
懼姑息之為害而屢盡底蘊不敢為雷同之說也當  
是時去嘉祐治平未遠其遺風餘澤能使士大夫如  
此豈不為天下福哉數十年間士風一變以馴致禍  
亂其源非無所自也觀司馬溫公與雜端劉公帖推  
許之重乃至是前輩之意遠矣夫紹興四年三月日  
昭武李某跋

跋顏魯公與柳冕帖

魯公草書摹傳於世者多矣此帖尤奇雖筆勢屈折  
如盤鋼刻玉勁峭之氣不少變蓋類其為人柳冕唐  
名士也魯公名呼之而自稱老夫亦可以見當時士  
契之梗槩云

跋司馬溫公趙清獻公帖

永嘉鮑君仕不過州縣而卓然自立不阿世以取容  
刻意群經為之訓釋觀其所上論新法書識度有大  
過人者非苟然也司馬溫公趙清獻公皆貽簡尺以  
獎與之歿雖久而名益傳嗟夫士之所學生不逢時

老死山林又無一世鉅公爲之稱道與草木同腐者  
多矣可勝慨哉

跋鄒公詩

積德鍾慶貽範將來必有賢子孫繼其後身享重名  
膺受福祿必有賢祖考啓於先此古今之通理也歷  
考載籍士大夫家世濟其美浸以光大靡不由此觀  
舍人公丁寧訓誨之時郎中都曹勤懇奉承之意爲  
人父爲子孫之道盡矣名譽福祿之報在其曾孫侍  
郎卓然爲世偉人子孫又多賢者鄒氏之門興未艾  
也願廣其傳以爲士夫之勸紹興甲寅季秋十有八  
日昭武李其謹題

慶餘長老開堂疏

法門差別善財勤南歷之誠祖道流通達磨露西來  
之旨萬派殊流而宗於一海千年暗室而破在一燈  
雖挑發前村自舍真諦而琴逢妙指方暢清音喻之  
者良馬見鞭迷之者癡猿捉月蓋飯色之殊寶器所  
感不齊則藕絲之掛須彌終難信解不有宗匠誰爲  
津梁餘師上人物外逍遙法中竒特爲已則心境俱

泯應機則殺活臨時禪律通融其契樂天之問雲山  
靜遠今難思大之居而况維摩示疾而莫匪爲人阿  
難辭世而重來說法既俯從於輿願宜遂演於潮音  
肯令雞嶺曇花不開閩嶺必使曹溪法雨重灑建溪  
至道不煩當仁不讓謹疏

跋尾

右建州大中寺長老慶餘師再開堂疏先公太師所  
作也元祐中先公任松溪尉帥住邑之中峯寺語道  
相契數以手帖往還時參政呂公誦若建安嘗詢衲  
僧中可與語者先公以師對呂公諭州郡請住大中  
寺學者雲集凡半年餘呂公一日約先公同游武夷  
山及歸則師已遷化一復時矣方其示寂升堂集衆  
告辭跣趺而遊經一晝夜顏色不變呂公泣涕痛悔  
恨未嘗款叩師之關鍵先公謂師平日所得奇特盍  
歸誠祈懇儻能復來呂公焚香再拜親以小磬就師  
耳根擊之至數十聲師忽開眼笑曰已相別何必爾  
爲公當再留七日遂下坐復居方丈呂公咨問道要  
且請師再開堂以疏文屬先公撰述其間有維摩示

疾而莫匪爲人阿難辭世而重來說法之語蓋<sub>二</sub>紀實也既七日再升堂而化呂公爲作碑具載本末置寺中宣和元年自左史謫沙陽道建安遊大中寺猶及見碑讀之一再過私竊歎仰後十四年紹興壬子歲被命宣撫荆廣經由建上屢經兵火寺宇僅有存者問碑所在則已亡矣爲之歎息又三年有住持龍山僧元植者師之法眷也聞嘗訪師遺跡惠然見過出先公所與師手帖以相示翰墨如新讀之泫然因留藏于家傳示子孫而爲親書四帖及開堂疏以遺<sub>三</sub>之用慰其心且使世之學佛者知道方之固死生一如去來自在有如此者紹興五年八月五日男具位某謹書

唐子方林夫送行詩章表跋尾

竊觀唐質肅公論潞公燈毬錦事有以見當時士風何其忠厚之至也夫大臣邀寵進不以正臺諫論列乃其職也人主未察震怒竄貶亦理之常而在廷之臣中執法如王舉正史官如蔡襄皆抗疏直前以營救之能文如梅堯臣李師中之流又作爲歌詩叙述

歎賞以激義夫之氣天子悔悟卒行其言不旋踵徙內地召還復用嗚呼茲非士風忠厚而盛德之事耶其後諫院公亦論荆公於熙寧間觸權臣怒謫官嶺海當時名士以詩送行者雖不乏人而營救之風則云矣一斤不復卒使抱義納忠之臣流落以死其視嘉祐得無愧乎至元符中道鄉鄒公以論椒房事遠竄則餞送者悉置典憲中永安光廟御諱彈奏猶以為輕望其據義以爭難矣誰復敢以詩章指時事而揄揚其美哉茲風一扇士氣頹靡君與見聞以鉗口結舌為當然任言責者不過抉摘細故以塞責隨時俯仰以為進身之資其視朝廷闕失不啻如越人視秦人之肥瘠甚者至顛倒是非變亂白黑以惑人主之聰明其肯長慮却顧為防微杜漸之計邪燕山之役廷臣至無一人言者職此之故馴致禍變至今為梗非無自而然也由是言之祖宗謹擇臺諫使之不言以舉繩愆糾繆之職涵養士風使之忠厚以盡激濁揚清之義豈非制治保邦之要道歟唐氏父子繼論時宰於權寵方隆之日面折廷爭無所顧避使名

節之美萃于一門可謂賢矣復用與不復用固不論也然二公之歿碑誌不立其族子邵陽太守遵懼歲月之繇遠而前德之堙墜哀集章表及送行詩等合爲一卷將刻諸石以垂不朽其意豈獨貽訓後裔爲家世之光哉使士大夫知前輩風節凜然若此有補天下多矣是可嘉也紹興五年歲次乙卯八月十八日武陽李某伯紀書

跋張栻仲樞密遺藁一

人材因事而奮節義臨難乃顯蕩陰之役血濺御衣獨有一嵇紹安史之亂肯唱義兵獨有一顏真卿朱泚之變叱三館之士使不從賊獨有一何蕃豈易得哉靖康之季分四道揔管以衛王室及金寇再犯關或擁兵坐視而不進或棄軍遠遯以自全獨樞密張公揔師西道轉戰以達都城所謀不從城陷被執猶惓惓抗章欲立趙氏其忠於國家大節如此雖古人何以加諸某頃執筆螭坳寓直東省公時夕拜瑣闥周旋甚歡迨靖康間宣撫兩河辟公之子叔獻以從嘗見所與家問勉以忠義固已歎服其後聞公遂

死國事爲之流涕自靖康至今十有一年叔獻持節  
江東某帥守豫章相遇於貴溪道中出示遺藁數軸  
讀之不覺淚之承睫也嗟乎士固有一死非死之難  
處死之爲難也如公之死得其所矣彼忘義而偷生  
者得不少有愧哉

跋二

士之立名節死國事雖志氣有所感激其平時曾次  
所養必有大過人者遇事而發非偶然也段太尉以  
笏擊朱泚或謂武人一時奮不顧身柳子厚獨爲哀

集遺事作傳以明其非真知言哉樞密張公忠義之  
節著矣臨去國日自期必死以書屬其家叙平生所  
操守真所謂中有所養臨大節而不可奪者耶書尾  
猶欲託不朽於墓表若區區於爲名者是不然名固  
士君子之所貴也聖人以名節砥礪天下故士有舍  
生取義不求生以害仁者唐顏魯公知必死李希烈  
自爲祭文墓誌常寘坐隅與公用心何異近世名節  
不立而惟自全之爲務宜乎遭 國家之大變而伏  
節死難之臣不能無愧於古人也如公卓然所自立



如此吁可畏而仰哉

跋趙正之所藏東坡春宴教坊詞

東坡樂語信筆而成初不停綴改不過數處萬對精切皆經史全語不假雕琢自然成章吁可畏而仰哉卷尾章草書淵明詩紙背乃講筵當讀真訓 藝祖遺潘美曹彬下江南方略此軸所謂三絕真可寶也

醉筆

東坡醉中作醒時文章今人醒時作醉中語殆不可曉也

草聖

東坡晚年草聖之妙如此蓋積學所致非特天資軼群絕倫也

行書

東坡行書萃于此軸直無愧於古人

跋溫公帖

紹興七年歲次丁巳初夏中泅彭城鄭顧道經從豫章出示溫公帖觀于精忠堂凜然如對盛德君子瞻其儀形面其語論也使人欽慕不能自己武陽李伯

紀書

書陳瑩中書簡集卷

故贈諫議大夫陳公與先公太師同年登科相好之情如兄弟然其為兒童時固已熟知公名政和乙未歲某自尚書考功郎謁告迎侍先公於霅上時諫議公自通州徙居天台邂逅相遇於吳門得一再見遽沐稱賞宣和己亥歲某自左史以言事謫官沙陽沙陽諫議公鄉里也時公在星子因其姪孫淵往省公寓書以通懇勤蒙誨荅良渥直以狄梁公李文靖王文正公事相期愧不敢當然竊不自意公見知之也靖康初蒙恩識擢於變故擾攘之際公已指館不及見每感知己未嘗不泫然流涕迨紹興丙辰歲被命帥守豫章以淵攝機幕暇日出示公平生往來書簡凡若干卷翰墨如新慶乎問勞外多論易象佛書及行已立朝之大節信筆輒千餘言理致條暢文不加點信乎道學淵源自其曾襟流出特立獨行之操非衆人之所能跂及也是可寶藏傳之雲來以俟後世君子紹興七年八月望具位李某書

梁谿先生文集卷第

十

陽

年



三  
八  
全

枚自若齡就傳時 家藏天申公詩 令德於課文之暇備述

始祖忠定公果溪文集自 先大父子珮公諱士達入嘉定縣庠館於零城  
時遭兵燹是集遂失去枚竊聞之以

始祖之豐功偉烈為宋代名臣其箋奏劄議詩文之屬不得仰窺其  
全深為浩嘆越二十年枚年甫三十供奉

內廷時与名公鉅卿及海內藏書諸名儒訪果溪文集晉耗竟無所聞又  
越二十餘年至雍正己酉下榻於衍聖公之九如堂見其牙籤玉軸充棟  
盈車詢之守者知果溪文集為舊族高陽相公持去高陽清霽

聖祖時既卜者也又越十餘年枚抑鬱無聊歷遊幕府過上谷所居之地道

徑高陽府第半扉荒基徐叩之而是集猶在乃取其藁篋捧親實為  
宋代鐫板鴻文偉議捧讀難竟因以歷年所作館穀傾囊與之  
而是集始得返趙嗟乎果溪文集吾家故物也越百年而無恙物  
之未歸亦有定數云乃詳述之以示後之子孫

乾隆六年歲在辛酉四月朔日二十六世孫枚謹識



李綱梁溪集一百八十卷述古堂書目載其名  
全集世不多有何論宋刻惟此宋刻殘本始  
十三終一百六十三當是一百八十卷之舊而闕存  
三十八卷者先是遭俗子割補卷第取卷  
中文字有數目者每卷填改鈐以圖記掩  
蓋其痕余悉案舊鈔本更正而以數目  
字還其原處有失去者仍以素帛空其  
格可謂慎之至矣此書購自東城故家價  
止數金今茲裝池復用二十金惟恐後人  
以殘闕視之而不甚寶貴故於其裝成  
之日著其顛末如此

嘉慶甲子六月二十日堯翁黃丕烈識



李綱梁溪集一百八十卷述古堂書目載其名全集世不多有何論宋刻惟此宋刻殘本始十三終一百六十三當是一百八十卷之舊而闕存三十八卷者先是遭俗子割補卷第取卷中文字有數目者每卷填改鈐以圖記掩蓋其痕余悉案舊鈔本更正而以數目字還其原處有失去者仍以素帛空其格可謂慎之至矣此書購自東城故家價止數金今茲裝池復用二十金惟恐後人以殘闕視之而不甚寶貴故於其裝成之日著其顛末如此

圖書在版編目(CIP)數據

梁溪先生文集/[宋]李綱撰.—北京:北京圖書館出版社,2004.12

(中華再造善本)

ISBN 7-5013-2640-1

I. 梁… II. 李… III. 李綱(1083~1140)—文集  
IV. Z424.4

中國版本圖書館CIP數據核字(2004)第134643號

ISBN 7-5013-2640-1



9 787501 326402 >

書名 梁溪先生文集(全二十冊)  
著者 [宋]李綱 撰

出版 北京圖書館出版社(100034 北京市西城區文津街七號)

發行 Tel:(010)66151313 Fax:(010)66174391

E-mail: Bistxb@nlc.gov.cn

Website: www.nlcpress.com

印刷 金壇市古籍印刷廠

開本 八

印張 一三〇·七五

版次 二〇〇四年十二月第一版第一次印刷

印數 一—二〇〇

書號 ISBN 7-5013-2640-1 / K·974  
定價 四一九〇圓

